

Internacionalni gala festival nacionalnih kuhinja

„KUKS“ Komitet za kulturnu saradnju medjunarodnih udruženja

Pod pokroviteljstvom Njegovog Kraljevskog Visočanstva Princa Konzorta, u čast Dana Ujedinjenin Nacija, 24.10. 2008. u svečanoj dvorani Gradske kuće Kopenhagen „Rådhus“ sa početkom u 19:00 h održan je 38. po redu Internacionalni gala festival, ovaj put nacionalnih kuhinja svijeta sa idejom da jelo kao specifikum jedne sredine može da bude put uspostavljanja pozitivne komunikacije medju ljudima i nacijama. Zajedno sa ostalih 33 zemlje, Bosna i Hercegovina se predstavila biranim jelima, reprezentativno pripremljenim i garniranim. Zvanice i gosti su pokazali veliko interesovanje i sa uživanjem probavali pripremljene specijalitete.

Bilo je pravo vizuelno i gurmansko zadovoljstvo posjetiti sto naše Ambasade. Pored primamljivih pita garniranih na tradicionalnim tacnama, bile su tu tufahije, tačno 24, poredane kao cvjetovi, snježno bijela voćna torta sa obrubom od malina kao rubinima, gusto složene kuglice od oraha umotane u bijele, šušlave žardinjere, proja ukrašena sa volanima od sira, smokve prelivene medom te palenta uz koziji sir, raznobojne zapečene papričice punjene kravljim sirom, plate sa maštovito složenim raznim vrstama suhog mesa uz travnički i dimljeni sir, oblatne, roza torta. Bilo je i napitaka sa geografskim porijeklom.

Kompletan dojam je dopunila i vrlo elegantna, vrijedna narodna nošnja koju smo specijalno dobili za ovu priliku. Nošnja je stigla iz Firme „Ognjište“ čiji je vlasnik entuzijasta i kolekcionar g. Risto Gavrilović. Ambasada Bosne i Hercegovine u Kopenhagenu se posebno zahvaljuje g. Ristu Gavriloviću na već tradicionalnoj, zaista lijepoj saradnji.

Takodje se zahvaljujemo g. Mirsadu Muhoviću, šefu Odjela za opšte poslove pri MIP BiH, Sarajevo, na razumijevanju i pomoći da nošnja blagovremeno stigne.

Zasluzne za ovogodišnje predstavljanje Bosne i Hercegovine u dvorani Rådhus, uz punu podršku Ambasadora Muhameda Hajdarevića, i kolega Branka Sukare, Mušana Agovića i Jasmina Džinića, su naša koleginica gdja. Gordana Kojić sa njenim ličnim kulinarskim umijećem koje je uložila u osmišljavanju, organizaciji i realizaciji predstavljanja na reprezentativan način, gdja. Selima Bejtović za odlično spremljene pite, gdja. Bedija Gušo koja je napravila ukusne oblatne, i gdja Alma sa svojom „roza tortom“.

Potrebno je napomenuti da su namirnice tipične za našu regiju, proizvedene i originalno pakovane u Bosni i Hercegovini, nabavljene u radnji „Asamo-Amadeus“ u Kopenhagenu.

Predlažemo da pogledate priložene fotografije koje djelimično prenose dio atmosfere.